



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim

tiryimyim@aolima

tir yimyim

TAPAK 3

Long jump asayar Sreeshankar 2024
Olympics atema qualify süogo

PM Modi-i France semdangba
sülen UAE semdang



VOL. XX NO. 273 (ADOK 273) DIMAPUR AMUNGNÜ (SUNDAY)

CHITENI (JULY) 16, 2023

₹ 5.00

Kohima nung "Heal Manipur" sentong agi



Kohima, July 15, 2023 (TYO): Honibarnü Khristan tamangertem Chakhesang Baptist Church Ministers' Hill Kohima (CBCMHK) nung adenshir Manipur nung yimjung aser tesünep atema sarasademtsüogo.

Kohima nung alirtemi Manipur nung yimjung aser tesünep atema "Heal Manipur" ta ser ghonda pungu sarasademba sentong ya CBCMHK-i ayongzükaga.

"Kidangertem ama onoki Tulusang Tsüngrem dang tanüla nung yirua alirtem nem taneptsü agütsütsü aser yimjung nung liyonga aotsü mapang moatsütsü sarasademtsür" ta CBCMHK nung Senior Pastor Rev Dr Vevo Phesao-i ashi.

"Manipur-i tanga state tem aser Myanmar den arstsütepa lir saka Nagaland ya anasatiba kidanger lir. Tebilemstü abenba adianutem aser medemertem ama asenoki indangindanga parnok den mejembitetaka Tsüngrem dang nungi teyari meshiba sentong ya agir" ta pai ashi.

Naga nungeri maneni tasür

kibongtem, yirua alirtem aser timtem ajurtem asoshi sarasademtsür. Iba sentong nung tenla ki aser tekülem ki raksatsürtem bilemetogo, ta Rev Phesao-isa metetdaksü.

"Asenoki taoksatsü tia ajuruba tetsür aser tanurtem, tarutsü putu nung tetsüdaksü ajuruba lanurtem aser senmang nung kongshiba taintem bilemteter. Asenoki aluyimertem, sorkar mapa inyakertem, shishilembartem aser nisung balala atema sarasademtsür" ta paisa ashi.

"Ozüng alema inyaksangshiba ajanga tajung kecha madoktsü anungji iba inyakyim anentsü atema sarasademter. Manipur nung tamangba yimsü temeten atema sarasademtsür. Maneni Manipur nung lennirtem aser tangatetba shitak aliba sensotemi olemtepa iba ken o angateteptsü atema CBCMHK-i sarasademtsüogo" ta Rev Phesao-isa ashi.

Iba sentong nung arogo aser lokti balala nungi tamanger 500 shi kati shilemagi ta paisa shisem.

Manipur nung tetsürtemi LPG truck 3 rongdoktsü

Imphal, July 15, 2023 (Agencies): Manipur kübok Imphal West district nung tetsürtemi LPG cylinders abenba truck gari asem rongdoktsüogo.

Iba lendong ya Sekmai yimtsüng nung atalok aser gari kiburji Kuki-Zo lisopur ka lir ta osang angazüker.

May 3 nungi truck asem ya Sekmai nung aliba IOC indang gas plant nung anena ayu. Misao Gas agency-i police nungi temelaba meshir Kangpokpi district-i anir aodang lendong ya atalok ta Indigenous Tribal Leaders' Forum (ITLF)-i ashi.

Garitem anir aoba osang ya nisung kati ashiba sülen tetsürtemi lenmang shibanger ata aser yasüng 12:00 ako meta truck garitem nung mi senoktsü. "Tetsürtem ya loktiliba anükertem ta ashir saka parnok

ya nisung tepsetertem, mi senoktsür aser telungpur den yaritepertem kümogo. Telungpurtemi lisopur aliba tesemtem amakdang tetsürtemi parnok yaritepogo, security forces-i yimdaklirtem tsükchirtem nungi jenbuttsü atema yaritsü merangdang noktang aser sepaitem tepsetba telungpurtem tashiyim agi chiokdaksü" ta ITLF-i metetdaksü.

Item tetsürtem yagi maongka dang ngura tai maketba tetsürtem aser tanurtem taküm dang mi agi rongsettsü tsübua mali, ta ITLF-isa ashi.

Biren Singh-i aniba sorkari tensa tajungba akümer ta ashir saka Manipur state nung yimjung mali. Iba jagi yimjung alitsü atema kin tem balala bendangtsü nüngdaker ta ITLF-isa ashi.

2024 Lok Sabha election atema BJP-i NDA asentenshitsü meranger

New Delhi, July 15, 2023 (Agencies): July 17-18 anogotem Opposition party tem Bengaluru nung tanabuba senden amentsü alidang BJP-ia July 18 nü Delhi nung National Democratic Alliance (NDA) senden ka jatepogo.

BJP-i iba senden nung taoba mapang NDA nung adenertem aser ano parnok den yaritepba telok tasentem jaokogo aser tang tashi nung political party 19-i adentsü shiogo ta osang angazüker.

BJP national president J P Nadda-i NDA nung adenertem dangi shidi zülüogo aser iba nung Ajit Pawar-i aniba NCP telok aser Jitan Ram Manjhi-i aniba Hindustani Awam Morcha teloktem dena lir.

NDA senden ya Parliament indang monsoon session tenzüksü anogo ana dang lia jateper saka iba ya floor coordination atema masü saka

2024 Lok Sabha elections atema NDA nung adenertem amalitep alitsü atema lir ta osang angazüker.

Iba senden nung Prime Minister Narendra Modi adentsü aser BJP-i parnok tashi sayuba mapang ka asütsü. Modi-i aniba sorkar kümsük tanabuba nung iba ama NDA senden tulu ya tang mezüng ayongogo.

2024 Lok Sabha elections nung Opposition party tem longjemer tokteptsü ta jembitepba mapang ka nung BJP-i taoba mapang parnok den yaritepertem den jembitsü aser ano tang parnok den teyaritepdakpurtem den tesentaktep akangshia NDA tashi itdaksütsü meranger.

NDA senden nung Eknath Shinde-i aniba Shiv Sena telok den Bihar nungi telok tilatem den Northeast region nungi BJP den yaritepertem adentsü.

Telok balalaji Chirag Paswan-

i aniba LJP (Ram Vilas), Upendra Kushwaha-i aniba Rashtriya Lok Samta Party, Sanjay Nishad-i aniba Nishad Party, Anupriya Patel-i aniba Apna Dal (Sonelal), JJP, Pawan Kalyan-i aniba Janasena, AIADMK, Tamil Maanila Congress, Indiya Makkal Kalvi Munnetra Kazhagam, All Jharkhand Students Union, Conrad Sangma-i aniba NCP, NDPP, SKF, Zoramthanga-i aniba Mizo National Front aser AGP lir.

BJP-i Chandrababu Naidu-i aniba TDP aser Sukhbir Badal-i aniba Shiromani Akali Dal dangi shidi yok asü meyok'ar mejangjater. 2024 election atema BJP-i taoba mapang parnok den yariteper telok ana den tejembidak lir. Ajisüaka TDP aser SAD nungi angazükba agi tanü Honibar tashi nung parnok NDA senden nung adentsü jaokba shidi kecha mangu.

'Act East' policy tu 'Act Least' policy kümogo: Mallikarjun Kharge

New Delhi, July 15, 2023 (Agencies): Modi-i aniba sorkari 'Act East' policy ya Northeast state tem nung 'Act Least' policy kümdaksüogo ta Congress President Mallikarjun Kharge-i ashi.

"Linük nung BJP-i telemsa aser tsempatep adokba politics tamajung inyaker. Manipur nung tensa kanga mejungi akümba ya asenok ajak asoshi tebilemstü ka lir. Onoki akokba tashi Manipur nung yimjung bener arutsü aser ken o tem angateteptsü merangtsü" ta Kharge-i ashi.

Lok Sabha elections 2024 atema Congress President Kharge-i Meghalaya, Arunachal Pradesh, Nagaland, Manipur, Tripura aser Sikkim nungi

lennirtem den senden ka amendang pai iba olen jembia liasü.

"Modi'er sorkar indang 'Act East' policy ya asen Northeastern States atema 'Act Least' policy kümogo. Kin o kin tsüngda rara adokdaksür aser freedom of speech azüoktsü meranger. Temeten balala atema ashishiteper" ta Kharge-i ashi.

Northeast nung Congress party-i nübertem taküm melenshitsüsa mapatong balala inyaka toksüba atema tanü BJP-i tenüng agir, ta Congress President-isa ashi.

"Congress party lennir aser züngsem shia longjemtsüla aser booth level nungi tenzüker mapa inyaksüla. Asenoki northeast

nung alirtem asoshi ola adoktsüla aser nübertem tonga oa ajuruteptsüla" ta pai senden nung ashi.

Iba senden nung Congress general secretary (organisation) K C Venugopal, AICC in-charge of Sikkim, Tripura & Nagaland Ajoy Kumar aser taoba Manipur chief minister Okram Ibobi Singh nunger den lennirtem aden.

Kharge-i state balala nungi lennirtem aser talisa taküm election agitsü aliba state lennirtem den senden mena arur. Paisa Madhya Pradesh, Chhattisgarh, Mizoram, Rajasthan aser Uttarakhand nungi Congress lennirtem den senden balala menogo.

LJP-RV-i Naga yimten, Manipur tebilemstü aser UCC atema metetdaksür

Dimapur, July 15, 2023 (TYO): July 15, 2023 nü Lok Janshakti Party - Ram Vilas (LJP-RV), Nagaland indang State Executive senden ka amendang onük aika benoka telemtepa kar agiogo.

LJP-RV senden nung Naga yimten tebilemstü indang benoka jembidang India sorkar aser olemteper nung adenertem dang tekaratiba nung iba ken o tembangtsü tayongzükba agütsütsü lemtet, ta Party Spokesperson Yitachu, Ex MLA-i sangdong ka nung ashi.

LJP-RV-isa Manipur nung ozüng alema inyaksangshiba aitsüba metetdaksü aser Centre o state sorkartem dang tensa

süngjemdaksütsü atema tayongzükba agütsür ta LJP-RV, Nagaland-i metetdaksü.

Parliament nung Uniform Civil Code (UCC) agizüktsü merangba anema noktaker kechiyong iba ajanga Constitution of India nung Arrla 371(A) nung timtem bentsür arutsü. Anungji state sorkari Assembly nung UCC anema bangzüng ka renemtsü ayongzükba ta LJP-RV, Nagaland-isa metetdaksü.

Chief Minister Neiphiu Rio-i LJP-RV, Nagaland nungi MLA ana- Dr. Sukhato A Sema aser Naiba Konyak na sorkar nung aniokba atema pelar, ta Yitachu-i sangdong nung shia lir.

BJP National President JP Nadda-i NDA nung ano adentsü atema National President LJP-RV Chirag Paswan jaokba atema pelar ta LJP-RV, Nagaland-isa metetdaksü.

Parnokisa Prime Minister Narendra Modi dang Council of Cabinet Ministers nung Chirag Paswan anioktsü mepishia metetdaksü.

Dr. Sukhato aser Naiba nati kanga dang meranga LJP-RV, Nagaland jenjang temabai ajungketba atema pelar aser tena lenisüba kübok party taginübatem tongtetsü imlar ta Party Spokesperson Yitachu-isa ashi.

Angh aser staff tem tenla agütsür ama züngoksem



Dimapur, Chiteni/July 15 (TYO): Pradhan Mantri T.B Mukta Bharat Abhiyaan nung shilem ka ama T.B agi shirangertem nem nutritional baskets lemtsüba sentong Dr. Imkongliba Ao Hall, Raj Bhavan, Kohima nung July 15 nü agiogo, kong Nagaland Angh La Ganesan-ia shilem agia liasü.

Sentong nung o jembiba mapang Angh-i, Alima nung India nung tuberculosis (TB) agi shiranger timba lir aser nisung lakh 26 shi dak tashidak poteter lir aser küm shia iba tashidak agi nisung lakh 4 shi asür, ta ashi. Paisa, TB ajanga taküm samaba, rongsen aaba nung tetsükdaktsü adokba aser mapa inyaksüba anogtem dak kongshiba ajanga rongsenketzüng nung tetsükdaktsü adoker ta ashi. TB yagi nisung ka rongsen aatsü atema nübu kanga junga kümer aliba mapang kongshir aser iba ajanga mapa inyaktetsüba anogtem lalur aser TB agi shirangertem sensak tia-i idaktsür, ta ashi.

Angh-i ashiba agi, Pradhan Mantri TB Mukta Bharat Abhiyaan ya India tir Droupadi Murmu-i 2022 küm September ita amenokja liasü. Paisa, Pradhan Mantri TB Mukta Bharat Abhiyaan ya Ato Kilonser Narendra Modi office-i achaayanger aser iba sentong amenokba nükjidongji 2025 küm tashi nungbo TB tashidak raktoktsü atema lir, koba Sustainable development Goals kübok United Nation-i TB tashidak samatsütsü asoshi

nükjidong yur aliba dang nungi küm pongu agi jelia asütsü.

Angh-i ashiba agi, TB tashidak samatsütsü asoshi nutritional support, libaliro aser working conditions amala lenla balala nung telangzüba shidak agütsütsü aser tashidak tendangtsü aser anepalutsü atema service tali agütsütsü nüngdaker ta ashi. Paisa, sorkari merandangba nung takok tajung nguyonga odar aser India nung TB tashidak samatsütsü asoshi lokti tentettemia tongtibang shilem agitetsü ta ashi. MoHFW-i, Ni-Kshay Mitra mesüra Doner ama nüburtem tejkadangi arua shilem agitsü asoshi jaoka, "Community Support to TB patients-Pradhan Mantri TB Mukta Bharat Abhiyaan benoka inyaksangshidar, ta pai ashi.

Ni-Kshay Mitra program nung lokti tentet balala, corporate, elected representatives, kija, institution, non-governmental organization, political party aser partner tem densema lir, shirnoki health facilities mesüra shirangertem adopt süa sorkari merangdanga aliba nung teyari agütsütetsü.

Angh, shiba Ni-Kshay ama züngoksema lir, pai Raj Bhavan officer aser staff temi Nikshay Mitras ama züngoksemsü atema tejkadangi aruba atema kanga pelaba lemsatep. Paisa, tarutsü nung Ni-kshay Mitras ama züngoksemsü atema ajungmesotsü asoshi tangzüka agütsütsü nüngdakba lemsatep. Pai, department aser Nagaland kübok district balala nung TB

cell tem tali yakyaka inyaksangshitsü ayongzüka liasü. Sentong nung Angh-i shirangertem nem nutritional Supplements Basket lemja liasü.

Secretary to the Governor Rajesh Soundararajan, shibai lokti pela agizükba o jembiba liasü, pai iba sentong ya beneficiaries tem nem nutritional supplements lemtsütsüba atem dang masü saka iba sentong indang tali tajungba metetdaksütsü aser Ni-Kshay Mitras mesüra Donors ama züngoksemsü atema senso tajungtem ajungmesotsü atema lir ta ashi.

Secretary-isa, Angh indang officer aser staff temi beneficiaries tem sponsor asütsü aser Nagaland Angh densema Raj Bhavan, Kohima nungi ajak senteper Ni-kshay 17-i iba sentong nongita yaritsü, ta ashi.

Maneni District TB Officer, Kohima Dr. Chiben Kithan-i, PMTB MBA Kohima ya 2022 küm September 19 nü amenok tashi. Paisa, iba sentong nükjidong indang metetdaksü aser nüburtemi nongita yariba ajanga lokti nung TB agi shirangertem mesenmetui amshiba tajemba akümtsü ta ashi. Paisa, Angh-i iba sentong nung shilem agiba atema kanga pelaba lemsatep. ADC, Kohima Rhosiethe Nguori, Directorate H&FW nung ketdangsurtem, State TB Cells, Governor's Secretariat nungi office aser staff temi iba sentong nung shilem agia liasü.

NSF-i HSLC & HSSLC toppers aser UPSC nung takok angurtem tushitsü

Kohima, Chiteni/July 15 (TYO): Naga Students' Federation (NSF)-i ayongzüka July 21 nü Capital Convention Centre, New Secretariat Road, Kohima nung Nagaland kübok tesem balala nungi HSLC & HSSLC examination 2023 nung Naga nung top per tem aser UPSC examination 2023 nung takok angurtem nem tetushi agütsüba sentong ka agitsü.

Iba sentong nung Jacob Zhimomi, Minister for PHE & Cooperation alakteta jaoker asütsü aser Vevotolu Kezo, UPSC AIR- 387 aser W. Aotula

Ozukum, UPSC AIR- 874 nati top per tem ajungshitsü.

Kasa mapang nung HSLC & HSSLC aser UPSC tatidang nung takok angurtem atema bendanga agütsü sarasadem ka ayongzüka agitsü.

Iba osang sangdongba mapang NSF secretary educatio Medovi Rhi-i, iba sentong ya 11 ako nungi tenzüka agitsü ta metetdaksü.

Maneni iba sentong nung shilem agitsü atema Kohima kübok aliba high school ajak nungi kaketshir pongungu yoktsü mepeshia metetdaksüogo.

Cataract Operation Camp tembangogo



Operation takok ngua agiba sülen Medical ketdangsurtem aser beneficiaries tem tangokba noksa nung angur.

Dimapur, Chiteni/July 15 (TYO): District Hospital Peren nung anogo pong atema angati Cataract Operation Camp ka ayongzüka agiba July 14 nü kanga takok ngua tembangogo.

Camp mapang tenük tashidak balala atema treatment agitsü asoshi nisung 271 züngoksema liasü aser parnok rongnungi cataracts 42, Basal cell Carcinoma Excision 1 aser severe Pterygium 1 densema operation 44 agia liasü.

Iba camp ya National Program for Control of Blindness & Visual Impairment Nagaland den longjemer District Health Society, Peren-i ayongzüka agia liasü.

Iba camp ya Sr. Specialist Dr. Hedungkiebe lenisüba nung takok ngua agiogo aser pai ashiba agi, operation team nung Dr. Phyantsuthung,

Consultant, Ophthalmology, Dist. Hospital Tuensang surgeon tongtiba, Dr. Lydia Ndang Sophie aser pa supporting surgeon aser mozüki nungi tanga staff tem aser Ophthalmic Assistants 3 densema liasü.

July 10 nü Additional Deputy Commissioner, Peren Keyirangding Hegui-i, tenük nung timtem alirtem dang iba maongka tajung agitsü atema ajungshia liasü aser paisa, angati camp ayongzüka iba facility agütsüba atema Medical department dang kanga pelaba lemsatepa liasü.

Camp nungsa Associate Professor, AIIMS Dr. Newete Lhomi-ia shilem agi, shiba July 11 nü operation tem agiba mapang teyari agüja liasü, ta District Media Officer CMO Office, Peren Shekho Sophie-i sangdong ka ajanga metetdaksü.

"Padmashree Natwar Thakkar Memorial Old-Age Home" semzüko

Dimapur, Chiteni/July 15 (TYO): Chuchuyimlang Baptist Arogo-i achaayanga "Padmashree Natwar Thakkar Memorial Old-Age Home" ta nüngja agütsür Old-Age Home ka July 15 nü Chuchuyimlang nung lapokogo. Iba sentong nung Arogo tenzükertem, Village Council züngsemtem, lenirtem aser Nagaland Gandhi Ashram, Chuchuyimlang ngutetsang asür Padmashree Natwar Thakkar kinungtsü Padmashree Lentina Thakkar aser nüburtemi shilem agia liasü.

Iba centre ya asür Natwar Thakkar-i shisatsü agütsüba dak ajemdaker amenokogo.

2009 küm senpet kar agizükba sülen pai Arogo nem sen lakh 2 tenla agütsü, kong Chuchuyimlang Citizens' Forum-i 2009 küm 'Lifetime Contribution to Naga People Award' den sen lakh ka agütsüba densema lir.

Tenla agütsüba mapang Thakkar-i Arogo dang yimtsüng nung tantsür tamburtem ajangzükdaktsütsü atema mapa kar benoka inyaksangshitsü mepeshia liasü. Iba sen ya tamendakdak ser Arogoi centre amenoktsü atema senotsü lenmang bushi aser iba den tenla balala bendena iba centre yanglua

liasü. Kasa mapang nung iba project atema Hans Foundation, New Delhi-ia sen lakh 5 tenla agüja liasü.

Sentong nung o jembiba mapang Construction Committee Convenor Lanumatong-i, project benoka inyakba indang metetdaksü aser Chuchuyimlang Baptist Arogo pastor Rev T. Lima, shiba lenisüba nung iba sentong agia liasü, pai iba centre inyaksangshiyonga aotsü asoshi sentong balala aliba indang metetdaksü. Paisa, iba centre ya Nagaland Gandhi Ashram, Chuchuyimlang, ngutetsang Padmashree Natwar Thakkar

tenung nung jatsüogo, shibai lokti nung tekübokba jenjang nung aliba nüburtem ajungkettsü atema inyakogo, ta ashi. Maneni pai, nüngdaka aliba yimtsüyimbu tem takokba tashi ajangzükdaktsütsü atema kanga junga shisadanger inyakyim tapet benoktsü ta ashi.

Kasa mapang nung Nagaland Gandhi Ashram, Chuchuyimlang, Managing Trustee Dr Aotoshi-i, nüburtem aser talisa lanurtem dang tantsür tamburtem nem voluntary services agütsütsü mepeshia liasü. Paisa, asen tsürapu aser tetsü tebou temi sen aser alirongsen balala dang

nungi shitemang aser tekelok shisatsü nung teyari tali nüngdaker ta ashi. Anungji iba Old-Age Home ya yimtsü yimbutem anepaluba tesem ka ama amshitsü kanga tongtibang ta paisa shisem.

Sentong nungsa Chuchuyimlang Village Council nungi Guru Chubatozung-i, iba inyakyim tajung asoshi asür Natwar Thakkar aser Chuchuyimlang Baptist Arogo dang kanga pelaba lemsatep. Paisa, iba inyakyim ya takok ma nung bener aotsü asoshi Village Council-ia takokba tashi teyari agütsütsü ta ashi.

PM Modi-i France semdangba sülen UAE semdang



July 15, 2025 nü Ato kilonser, Narendra Modi France nungi Abu Dhabi (UAE) tonga aoba mapang UAE Tir aser yimsüsür, H.H. Sheikh Mohamed bin Zayed Al Nahyan-i pa agizükba sülen tangokba noksa nung angur.

Abu Dhabi, Chiteni/July 15 (Agencies): Ato kilonser, Narendra Modi-i anogo ananü France semdangba sülen Honibarnü UAE yimtiba, Abu Dhabi tonga ogo.

Modi-i France Tir, Emmanuel Macron densema tongti ketdangser aika den senden amen aser France-i Modi nem linük nung tematiba civilian aser military award-'Grand Cross of the Legion of Honour' agüja liasü.

Modi-i France semdangba mapang nung kümsük talangka atema visas agütsüsü, university partnerships aser Covid-19 wara ajanga kongshiba onüktema jembia liasü.

July 14 nü France yimtiba, Paris nung Bastille Day parade

nung Modi tetushi tejaoker ama aden aser kasa parade nungji India nungia contingent kati shilem agi.

UAE semdangba mapang nung Modi-i tongtibangsä linük ana tsüngda energy, chiyungtsü security aser defence tesendaktep tashi itshitsü atema jembitsü.

Modi-i semdangba mapang nung India aser UAE natisa tamalen linük ana tsüngda shishilembaba tsütsü tezüngzüktep agia aliba jenjang asadangtsü.

Ato kilonser Modi-i UAE Tir aser Abu Dhabi nung yimsüsür, Sheikh Mohamed bin Zayed Al Nahyan den senden amentsü.

India aser UAE na tsüngda shishilembaba, investments,

energy, chiyungtsü security, science & technology, shisaliok, fintech, defence aser security lenlatem nunga amalitepa inyaker.

Tang UAE nung nütsüng shilem 30 shibo India nung lir. 2021 küm tashi nung UAE nung India nung million 3.5 liasü.

Ministry of External Affairs-i sangdong ka ajanga, "India-UAE tsüngda asalentong tsütsü partnership tashi taitba kümдар aser Ato kilonseri semdangba ajanga energy, shisaliok, healthcare, chiyungtsü security, fintech, defence aser sobaliba densema lenla aika nung amalitep jenjang ano tajungba akümtsü atema lenmang bushitsü asoshi maongka angutsü," ta metetdakja liasü.

India aser France nati submarine yanglutsü atema tezüngzüktep agi

New Delhi, Chiteni/July 15 (Agencies): Ato kilonser Narendra Modi-i France semdangba mapang nung Mumbai aser Kolkata na nung subramines yanglutsü atema India aser France nati tezüngzüktep ka agiogo.

Iba tezüngzüktep agiba ajanga "Make in India" mapatong tashi taitba akümtsü, kechiyong Mazagon Dockyards Limited aser French Naval Group nati senteper Scorpene class submarines yanglutsü.

Iba dak alia India nung nungdak peritsü aser International Naval forces atema rong yanglutsü atema-a Garden Reach Shipbuilders &

Engineers Ltd. (GRSE) aser European Naval Defence Industry lenir Naval Group France na tsüngda tezüngzüktep ka agiogo.

Taküm küm tatembanglen tashi nung French company Safran aser Defence Research & Development Organisation (DRDO) nati iba atemaji project ka renemtsü.

Mezüngbuba Scorpene submarine construction programme (P75 - Kalvari) takok anguba sülen ano kasa subramine asem yanglutsü atema Mazgon Dockyard Ltd aser Naval Group nati MoU sign asür.

India aser France na tsüngda

asalentong tsütsü partnership yangluba sülen taküm küm 25 ajunger, ajioda Ato kilonser Modi aser France Tir, Macron napronglai linük ana nungi navy tem longjemer amalitepa inyakba atema tenüngsang agütsüogo.

Raradang tziü telung nung senzüa raraba rong 'Scorpene Submarines' ya radar mesüra sonar agia meputettsüa kanga advanced features keta lir.

Iba subramines nung meta talang tashi khatetba torpedoes aser missiles lir. Scorpene submarine nung diesel electric propulsion system amshir aser khen totziü inokba agi anogo 50 shi amshitetsü.



India aser France nati Mumbai nung Scorpene submarine asem yanglutsü atema Hokolbarnü tezüngzüktep ka agiogo. Taküm April ita nung Mumbai nung aliba Mazagon Dock nung Indian Navy indang Scorpene-class submarine INS Vagsheer semzükba mapang tangokba noksa nung angur.

Bihar nung tsüngi lendong balala nung nisung 18 tashi süogo

Patna, July 15 (Agencies): Tesüiba ghonda 24 tsüngda Bihar state tesem balala nung tsüngi lendong nung nisung 18 tashi süogo.

State nung tsüngi lendong nung asürtemji nisung pongu Rohtas district nungi liasü, Arwal nung nisung pezü asü, Saran nung asem, Aurangabad aser East Champaran na nung nisung anana aser Banka o Vaishali district na nunga nisung kaka asü.

Chief Minister, Nitish Kumar-i asür kibongtem den mangyim jashi lemsatepba den külemi takoksa angur kibong shia nem sen lakh pezüzü (lakh 4) teyari agütsüsü, ta sangdong.

State disaster management agency-i nüburtem, talisa yimtsüngtem nung alirtem dang tziüglu sashia aruba mapang nung alui maotsü, süngdong mesüra electric light indong kübok mejenoktsü aser ajungli agi yangluba ki telung nung malitsü tekümdangtsü metetdaksüogo.

Parnokisa jila-yimtitem nung

alirtem danga tziüglu arudang kichiba anasa menokdaksü, refrigerators mesüra ACs ama electric osettem nung mekongshitsü, phone charge tesüdak mapang mamshitsü mesüra kilem kolaki matutsü tekümdangtsü metetdaksü.

Tziüglu sashia arua tziügmok amokdang na kima moapu nung lira idangyongjisa ki bushia jenokang, ta parnokisa metetdaksü.

India nung tanabuba Lightning Report ajanga ashiba agi, April 1, 2020 nungi March 31, 2021 tsüngda India nung tsüngi lendong nung nisung teimtiba asüba state ji Bihar liasü (nisung 401 asü); Uttar Pradesh nunga nisung 238 asü, Madhya Pradesh nung 228, Odisha nung 156 aser Jharkhand nunga nisung 132 asü. Tziügluruwa mongpu nung India nung talisa state pongu-Maharashtra, Kerala, West Bengal, Jharkhand aser Karnataka state tem nung tsüngi lendong kanga bulua ataloker.

Delhi nung tziü metsüng atema AAP aser BJP na tai tongloktsüteper



New Delhi, July 15, 2023: Delhi nung tziü metsünga aliba tesem ka nung nisungtem senzüba noksa nung angur. Yamuna ayong nung tziü metre 208.66 tashi atua liasü saka Hokolbar aonung nungi iba ayong nung tziü ajema kümдар.

New Delhi, July 15 (Agencies): Delhi nung aliba Yamuna ayong nung tziü level metre 208.66 tashi atuba sülen tangbo iba ayong nung tziü ajema kümдар, ajisüaka Aam Aadmi Party (AAP)-ibo, Delhi nung tziü metsüng tensa atalokdaksütsü asalentong yanglua Haryana nung aliba Hathnikund Barrage nungi tziü tali chiok, ta melung malemer.

Honibarnü osangbenertem senden ka nung jembidang Delhi Irrigation & Flood Control Minister, Saurabh Bhardwaj-i, tziü metsüng tensa ya yimti nung tziü metsüngdaksütsü atema asalentong yangluba lir, ta ashi.

"Hathnikund Barrage nung aliba tziü taliji Delhi-i dang yok. Delhi nung Supreme Court densema tongtibang reju ajak nung tziü atsüngdaksütsü atema asalentong ka liasü," ta pai ashi.

Paisa, Hathnikund barrage nungi tziü Haryana kübok Western Canal aser Uttar Pradesh kübok Eastern Canal-ibo meyok, ta ashi.

Delhi PWD minister, Atishi-

ia, yimti nung tziü metsüng tensa ya paidokteta liasü, ta ashi.

Laisa, Yamuna ayong nung tziü tali metsüngba ajanga tesem balala nung takoksa angurtem nem anisüngzük angutsü, kechiyong Yamuna ayong nung tziü tanem-tanemi tajemba kümдар, ta ashi.

AAP lenir, Somnath Bharti-ia, Delhi nung tziü metsüng ya BJP-i sayangtetba lendong lir, ta ashi.

"UP aser Haryana na nung canals kong-konga lir. Metetsümonga tziüji Delhi tsütsüleni dang yok. Delhi nung tziü metsüng ya BJP-i yangluba lendong lir," ta pai ashi.

Ano külen Delhi BJP Tir, Virendra Sachdeva-ibo, Delhi nung AAP sorkari teinyaktsü mapa meinyakteter, aser yimti nung tziü metsüng atema tanga state tem nem tai tongloktsür, ta ashi.

Delhi nung tziü metsüng tensa ajanga sorkari Amongnü tashi schools, colleges aser water treatment plants shibangtsü sangdonga liasü.



TIR YIMYIM YIMOBILEM (EDITORIAL)

DIMAPUR AMUNGNÜ, CHITENI (JULY) 16, 2023

Ain nung inyakterem

Tsüngrem yimlji o jembiba nung masü saka ain nung lir ta 1 Korint 4:20 nung shia lir. Iba Lai tekong nung shia aliba Tsüngrem o ya tanü tensa asenok dak kanga petpeter ta bilemer. Asenok ajaki Tsüngrem temeim indang jembir saka jembiba ama asenoki melitetter. Asenok aikati Tsüngrem mapa inyaker aser kanga junga sayutsüngir saka Tsüngrem ain adenba temaitsü kecha mangur. Aji oda, Khristan taküm ya mapa tulu inyaktsü bilemba dang masü mesüra mezümeküma aliba purtema masü saka Khristan takümji Tsüngrem tashi aser ain nung alir. Tenyar Paul Tsüngrem tanüla temeshi agi sünger ain nung sayutsüngia jajaba mapang, Korint nung alirtem kari pa sayutsüngiba aitsü aser parnoki sayutsüngibaji dang shitak ta amangba purtem mesüzüktsü kanga meranga jajaa liasü. Ajisüaka, Paul sayutsüngia jajaba den pa anemertemi sayutsüngibaji medemdangra kenyongi tepila talangka liasü. Paul-i ain nung sayutsüngi saka pa anemertem dak tanüla temeshi ain maliasü. Ibayongji, Paul-isa Korint 10:10 nung pa anemertemi pa indang majung jembitsüba ajanga amangba purtem memetsüdaktsü aser mashileni maotsü atema tekümanötsü o kar ashidang, karibo pai shiti tajung aser sashisashia zuluaka, pa dak tashimait aika lir aser pai takitsü o mejembir ta jembitsür, ajisüaka Tsüngrem yimlji o kija junga jembiba agi masü saka ain agi inyakba ajanga dang angatetter ta shia angutsü. Tenyar Paul ajanga nisung aika temulung meyipa Yisu dak amangdaktsü aser arogo tenzükyong ao. Pai shiranger jungtsü aser tasür a shia arudaktsü. Pa anemertemi ashi ama, Tenyar Paul-ji o jembiba nung tsüngro masong asütsüa akok saka pai jembiba otem nungji Tsüngrem ain aser tashi dena liasü. Atangji, Tenyar Paul mapang Korint nung sayutsüngia jajar amaji, tanüa Tsüngrem yimlji indang sayutsüngia jajar asenoki aika ajurutsüa akok. Parnok jagi o kanga junga jembitsü akok. Parnok jagi asenok dang alima tesem balala nung atalokba indang tejangja bener arua ashitsüa akok. Ajisüaka, tagitsüabajibo parnoki jembiba nungji Tsüngrem ain dena ali asü mali aser parnok taküm nung tanüla temeshi tashi ali asü mali ta asübaji asütsü. Nisung karibo Laishiba nung aluba o kanga junga jembitsüa akok saka pai jembiba ama pa taküm melitetra, pai jembiba oji ain maketba o aser pa takümji tazüngla taküm asütsü. Nisung kari Tsüngrem ain aser tashi indang jembitsüa akok saka pa taküm nung Tsüngrem ain aser tashi agi akokba kuli melira, pa oji takidak makaba o akümtsü. Takokba Khristan taküm ka alitsü asoshi jembitsübo kanga temela saka mapa agi inyaka sayutsübo kanga tasak lir. Asenok rongnunga 2 Timoti 3:5 nung shia aliba ama, "temeshiba mesüka benschir saka iba tashi ainbo mali," ta lia lira, Tsüngrem tsüngdang asenok temenen nangzüktsüla aser tanüla temeshi agi süngjang ta ashitsüla. Idangji dang asenok taküm nung Tsüngrem ain aser tashi adentsü.

OLEMSABANG

TENÜNGSANG AGÜTSÜBA ASER TASHI-SHITEPBA NUNG ANUNGAKONGA MALITSÜLA

~ L. Kika Pongener

Alima nung alidang nisunger sobaliba aser libaliro tajung kaji, takok tajung angudang aser mapa tajung inyaktetdang kati ka nem tenüngsang agütsüba aser lendong timtem ajurudang asüwaa ta tashi-shitepba aser tasü-tama ajurudang mang-yimtepba item ya mapa tajung asütsü. Putu aika asenok shisatsü temesu, tangatetba tila, kati ka ajungba mereprangnuba, tenukmerem, mekokachi agi sunger, takok tajung anguba aser mapa tajung inyaktetba nunga junger nii...ta tenüngsang magütsütepi lia aruogo. Ajisuaka, tanübo asenoka terabo tangar libaliro yimya angur asü masü'ar, kati ka nem tenüngsang agütsütsü terabo meteta kümogo ta kangasa pelaseta bilemer. Tawa asen Aotsür Aor lanur tajung asem-pezü tashi agi Union Public Service Commission Examination (UPSC) nung takok ngur IAS, IPS IFS, etc. yamala menden tajung anguba, ano kaketshir lanur aikati Nagaland Public Service Commission Examination (NPSC) nung takok ngur mapa tajung aser menden tajung anguba, ano yashi-yakünu Nagaland Staff Selection Board Examination (NSSB) nung takok anguba agi mapa tajung anguba...item ajak asoshi kin-kidong, yimtsür-yimer, tzükongsanger, ajaki 'Social Media' balala nung tenüngsang agütsüba angudang kangasa temulung chia bilemer, kechiyung kati ka nem tenüngsang agütsütepba jagi shirnoki takok nguogo parnok atema dang masü, saka tanüngba kaketshir lanurtem asoshia meranga inyaktsü atema tajungshiba tulu agütsür. Aji oda, post tila-a suang tulu-a suang, kaketshir noklang/merijang aikati toktepa tatidang agütsüba rongnungi ishika shimtetba rongnung adenbaji, aji odangpo shimtetba masü, anungji tenüngsang agütsütsü kanga dang tetemsu lir. Tanü putu ya tajunger rongnunga tajungertem shimtetba putu ka nung asenok alir. Anungji joko sorkar mapa asüyongjia, Company mapa asüyongjia, mesura kechi mapa sudir suaka, tezülen (Back-Door) nungi adokbajibo menden tajung aser Post tajung anguyongjia kecha konang nungsang maka, saka kechi komala mapa ka sudir suaka 'Competative Examination' ajanga angubajibo nubur ajungai züngshir aser tushir. Anungji kaketshir lanurtem ajungai meranga zünger aser meranga inyaker iba ama mapaji ajangzüktsü merangtsüla. Nuburtem-ia iba ama takok tajung anguba nungbo junger-ko sang nii...merangang nii...ta tenüngsang agüja ajungshiteptsüla.

Ano sai-sapong aser lenla balala nung takok tajung angurtem...Gold Medal, Silver Medal, Brownze Medal, Award, Commendation Certificates, etc. yamala angurtem nema tetushi aser tenüngsang agütsütsüla. Ano Matric, Secondary, Gratuation, Post-Gratuation aser Doctorate, yamala nung takok tajung (Top Position) angurtem nema tetushi aser tenüngsang agütsütsüla. Iba ama kati ka nem tetushi aser tenüngsang agütsütepba jagi kati ka tsüngda nung tesendaktep tajung yanglur, asen lokti nung telongjem tali akangshir aser tarutsü nunga ano takok tajung angur jenti adoktsü temoatsü meshir. Koba lima, koba yimtsüng aser koba telok nung tenüngsang agütsütepba agi anungakonga lidir, iba lima, iba yimtsüng aser iba telok-tentet nungjagi takok tajung angur bulua madoktsü. Asen Aotsür Aor dak tashimait kaji, pei adianu, pei zünger-pur, pei medemsor, pei meposanger, pei kin-kidong, pei yimtsür-yimer, pei tzükongsanger aser pei kin rongnungi kari, mesura chirnur kari takok tajung angunung aji junger nii... ta tenüngsang agütsütsü melena, aji shitak masüa ta asü ako...aji langka meshitak-ka lir ta asü ako...mesura aji yamaji...yamaji dang ako...küli tapu-tapu kishia bushia jungnatsütsü meranger aser remsepa yutsütsü meranger. Ajisuaka, kechi-komarka jungnatsütsü merangaka, tajungtsüpur kajibo odang ajungtsübasu, saka shirnoki tangar ajungba jungnatsütsü meranger...repranga liang par jala-jabaso, par chirnur-semchisemnur rongnungi kodanga tangar ama konang-nungsang bentsür arutsüsa madoktsü. Anungji mapa tajung nungbo junger nii...ta tenüngsang agütsütsüba nung anungakonga melili.

Ano mapang kar nung asenok rongnung külem lisemer, kiyong-kidanger, meposanger, kin-kidong, lokti-tentet, yimtsür-yimer, tzükongsanger, senso telongjem nung külem saru-toker kar dak lendong timtem atalokra, senso ajaki 'asüwaa' ta küküa mang ayimtsüla. Ano kangasa tongtipang kaji, pei senso tajung, külem saru-toker kar dak 'Accident' kar ataloka taküm samara, yiro-yipong tulu atalokra, kari ashi-külaka tepsetra, tetsür kar dak tashiyim agi mapa tamajung/maaksu mapa inyakra, mesura mimchir sobaliba dak maketba meinyaktsüyim/mebenshitsüyim kar benschia tashiyim mapa inyakra, pei kin-kidongi, pei sensosangeri, pei tzükongsangeri aser pei kin-i tashi-shija 'Social Media' aser yimjak nung yimyim ayimokja..."Shirnoki ozü senso tajung dak iba ama mapa tamajung inyakogo...ozü sensosanger ajaki küküa aitsür aser iba mapa ya temeden mangu tashi tatem tashi bushitsü...Anungji ozüng ammertemi tekaratiba nung mapa tamajung inyaktertemji apohtsüla aser ozüngi melaba ama merenshitsüla"... ta ayimoktsütsüla. Aji oda, pei kin-kidong, pei sensosanger, pei tzükongsanger, pei kini iba ama tashi-shija yimjak nung ayimoktsüba jagi, ashikular nisung tamajungertem-jia kümdanger aser sobaliba libaliro tajung alima nubur matsüngdang sayur. Ajiser, iba ama kati ka tashi-shitepa mang-yimtepba jagi telongjem tali akangshir. Aji oda, saru-molok toka senso telongjem tenteta ayubaji iba ama tensa tia ajurudang tashi-shiteptsü kanga tongtipang lir. Iba ama kati ka tashi-shitepba mapa nung lennir shingaia tanak-temesung, tulu-tila, takar-sensaker, kin-kidong apia, tejak repranga meinyaktsüla. Aji oda pei senso tajung ka atema mang-ayimtsü tim sernung mang meyimi toktsüra Tsüngrem aser nisung tsüngdang sentsüh tulu asütsü. Otsüla-oboula nunger mapang nunga nokinketer temeranger alepba, pei yimeri mang-mayim toktsüba agi nokinketer/walunir tajung madokba otsü lir-ko. Anungji akokba tashi tenüngsang agütsütsü tim nungbo tenüngsang agütsüdi aser mang-ayimtsü tim nungbo mang-yimdi ta ayungzükter.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Archaeologist temi Laishiba nung shia aliba Sodom yimti ngutetogo



Jordan anüolen Tasü Tzüyim anasa Tall el-Hammam Excavation Project kübok archaeologist temi ali tua bushisügangba mapang tangokba noksa nung angur. Tall el-Hammam Excavation Project ya Trinity Southwest University aser Veritas International University nati senteper tenzük.

July 15, 2023: Taoba ita June ita tatembanglen archaeologist kati, Laishiba nung shia aliba yimti, Sodom aliba tesem ngutetogo, ta metetdaksü.

Interview ka nung jembidang Trinity Southwest University nung Dean of Archaeology, Steven Collins-i Joel C. Rosenberg dang, "Jordan linük anüolen aser Tasü Tzüyim anasa nung Tell el-Hammam site nung akhidang Sodom yimti liasü, ta ashitsüsa kü den ozü team-i kuli aika ngutetogo," ta metetdaksü.

Iba tesem nungji Bronze Age mapang nung kanga tatsük agi molusaba ama oset aika ngutetogo; Laishiba nung Tsüngremi Sodom yimti samatsüba indang otsü ya Lipok 19:1-28 nung shia lir.

Collins-i aniba team nungi archaeologist kati, iba tesem ya New Mexico nung aliba Trinity nuclear test site nung atom bomb tendangba tesem amai amai lir, ta ashi.

Tamalen-a iba tesem nung mijang agi akümba 'layer' aser oset aika molusaba nguteta liasü.

"Item kuli ajanga, iba tesem ya tenük mesepshi nung khen nung raksatsüba liasü jangjar," ta Collins-i ashi.

Collins-i, "Nai Sodom yimti bushitetsüsa Laishiba nung geography indang 25 shia lir. Tatishitsü agi Lipok 13:10 nung yamai shia lir, Lot Bethel aser Ai nung liasü, pai anüdoklen tsütsüleni ao. Tall el-Hammam ya Bethel aser Ai anüdoklen tsütsü lir," ta ashi.

Bronze Age mapang nung aliba Sodom yimti ya southern Jordan Valley nung liasü, aser iba yimti ya akhidang Yirusalem yimti dang nungi terben agi tuluba aser Yericho yimti dang nungi ponguben agi tuluba liasü. Sodom yimti ya yimti kanga tuluka liasü aser Chalcolithic Period nungi Bronze Age (4700 BCE-1650 BCE) tashi nung iba yimti ya küm 3,000 shi liasü.

Tamalen-a archaeologist temi Tell el-Hammam site nung ya nisung teret, chipo teraksa, aser oset balala molusaba nguteta liasü.

Akhidang iba yimti ya temperature kanga tatsük, 2,000°C dang nungi teimba ajanga raksatsü, ta archaeologist temi bushitet.

Uganda linük nung Islam yimsü toktsüba atema Khristan ka tepset

Nairobi (Kenya), July 15 (Agencies): Hopta ana tejaklen anüdoklen Uganda nung arrshi küm 22 Muslim nung kati Khristan yimsü agizükba agi tepsetogo.

Abudu Amisi ya Pallisa District kübok Kasanvu yimdak nungi liasü. Pa Kasasira West yimdak-i oa market nung shishiba sülen meyipa arudang Muslim nungertemi pa dak kotari agi atsüng. Pa hospital-i anir aoba mapang nung süadok.

Amisi-i ita trok tashi Khristan yimsü indang angazüka aruba sülen taküm June 22 nü pai Khrista agizüka

liasü aser July 8 nü pa tepset. Pai kinüngtsü den arrshi küm 3 jabaso ka toktsür asü.

Pallisa aser Kibuku district na nung Muslim nung missionary tem den pa tesendaktep liasü, ta Khristan lenir kati metetdaksü.

"Amisi-i Khristan yimsü agizükba sülen par yimdak pai Muslim nungertem kanga tsübua liasü, anungji Arogoi pa para ki ka nung jenokdaksü aser pa hopta ana tashi kidang nungjagi mayazüki liasü," ta Arogo lenir kati metetdaksü.

Khristan lenirtem seminar ka atema July 8 nü Arogoi Amisi den nisung ana

chiyungtsü alitsü atema market-i yoka liasü. Chiyungtsü aliba sülen parnok kidangi shilangba mapang nung Muslim nungertemi Amisa tenüng tetshia, 'Islam yimsü ashioktsüsang arudar. Pa tepsettsüla' ta ayimdena liasü.

Iba sülen parnoki pa longbanger kotari amshia tekolak aser tejak yirutsüba den külemi tetsüng aser teka sükdangtsü.

Arogo pastor den police-i pa Mbale Regional Referral Hospital-i anir aoba mapang lenmang tom nung süadok, kechiyong iba mapang nungjibo azü aika yimdoker liasü.

Khristantem temeshi aini Yirusalem-i aoba scheme tenzüksüla: AIADMK

Chennai, July 15 (Agencies): Tamil Nadu nung AIADMK general secretary, Edappadi K Palaniswami-i state sorkari Khristantem Yirusalem yimti-i temeshi aini anir aotsü atema senotsü magütsüba atema sorkar aitsüba den külemi iba scheme tenzüksüla takhangba agütsü.

Khristantem temeshi aini

Yirusalem-i aotsü atema senotsü teyari agütsüba scheme ya coronavirus wara mapang nung anena liasü.

Palaniswami-i sangdong ka ajanga, taoba mapang AIADMK sorkari tenzükba scheme ajanga 2019 küm tashi nung Khristan 4,128 tajangzük nguogo aser iba mapang nungji iba scheme atema sorkari sen

crore 8.25 indoka liasü, ta metetdaksü.

Taoba mapang state Chief Minister Palaniswami-isa, DMK sorkarisa election nüboyimba mapang nung mapang talangka Jail nung puoka aliba Muslim nungertem chiochtsü nangzükba liasü, saka parnoki nangzükba ama meinyaker, ta aitsü.

ANOGO ABEN TSÜNGREM DEN

NISUNG TEBENDANG

"Anungji joko kati ka o mebendangli, saka nenoki ya lemtetang shingaia pei adianu lenmang nung memetsüidaktsüitsii mestra talangdaksüma."

-Rom 14:13

Alima nung nisung ka takümi aibelenba indang shisadanga bushitsüji kanga tongtibang. Aiben asenoki asen taküm jenjang mebilemdangi tangar ka taküm nung aibelen tashi maitbatem indang shisadanga jembitsür, aser iba mapaji asenok meimchirtemi kanga dang jangratemsü ka ama bilemer.

Aji saka tangar taküm ka tashi maitbatem shisadanga bushiba ajanga asen taküm nung aibelen temenen-ang tali bendenloker. "Onok tenzükba mapa nung shinga nema tai majittdaktsütsü asoshi shinga lenmang nunga tenokdangbaji onoki meyutsür" (1 Korint 6:3). Paul-i shinübaji, asen taküm merükteta shinga nema asen tai majittdaktsütsü asoshi asenoki tangar taküm ka anema o mebendangtsüla, kechiaser aseni koda tangar ka tai apur, yamaji asen takümjia tangar kari shisadanga züngdar.

SARASADEM:

Ni kü taküm tendanga meshiteta alitsü yariangma. Amen

Nicaragua nung putir Rolando Jose Alvarez maneni tepuokdak ayutsü

July 15, 2023: Nicaragua nung yimsüsürtemi tuyuba ama putir kati bendangleni oa alitsü memelungba agi pa maneni tepuokdak ayutsü tuyuogo.

Linük nung Daniel Ortega yimsüsüba kübok Arogo aser Khristantem anema inyaker.

Bodhbarnü US Conference of Catholic Bishops-i sangdong ka ajanga, July ita tetenzüklen putir Rolando Jose Alvarez Lagos-i Vatican nungi ketdangser ka ajurua liasü.

Vatican nungi ketdangseri Nicaragua sorkari tuyuba ama linük nungi aienshia Rome nung alitsü pa dang mepishia liasü, ajisüaka pai linük toktsür aotsü melungba agi tanaben jail nung puoktsü.

Christian Solidarity Worldwide (CSW)-i, Alvarez tanaben La Modelo Tipitapa jail nung puokogo, ta metetdaksü.

Alvarez ya mezüng 2022 küm apu aser pai linük security anema inyaker, ta pa nem tai tonglojka taküm February 10 nü pa küm 26 tepuokdak ayutsü obendang agüja liasü.

Ortega-i linük nung Khristantem anema inyakba atema Alvarez-i Ortega anema jembia liasü.

Taküm June 28 nü Inter-American Court of Human Rights-i Nicaragua sorkar dang pa chiochtsü tetuyuba agüja liasü.

USCCB Committee on International Justice & Peace chairman aser Rockford, Illinois



Rolando Jose Alvarez

nung aliba Roman Catholic Arogo nung putir, David J. Malloy-i. "Iba obendang ya tim masü. Ni United States aser alima linüktem dang putir atema sarasademtsütsü mepishir," ta metetdaksü.

"Talisa tawa Interamerican Court of Human Rights-i tuyuba ama tangsa putir Alvarez chiochtsü akhanger. Alvarez tang tashi tepuokdak ayuba ya tim masü, anungji tekeraba nung chiochtsüla," ta pai sangdong ka ajanga metetdaksü.

Tawa Nicaragua nung lawyer, Martha Patricia Molina Montenegro-i 2018 küm nungi tenzükba sorkari Arogo anema inyakba tatalokba 190 dak tema aliba metetdaksü.

Linük nung rongsenketzüng jenjang mejungi akümba atema Ortega aser pa kinüngtsü tatong Tir, Rosario Murillo nati tangsa anentsüla, ta takhangba agüja longkak aiterem Arogoi yariba aser jenokdaksüba atema sorkari Arogo anema inyaker.

**AO OSHI ANGAZÜKDAK:
TANÜ ANGAZÜKTSÜBA OJANG**



Repji

(n) Lasüing ama menemba tu tazü achiba aonsutsü (type of leek)

* **Repji** lon den chiyonger sülen tepo meyudoktsüla.

Replik

(v) densem, anilok (merge)

* Sentepi onok den tanubusang dena **reploka** anir ao.

OLONG PAITEP # 6577

1		2		3		4		5
			6		7			
8								
					9			
		10						
11								12
				13			14	
15								
16							17	

TIPLIN

1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

1. Jila tulu - (5)
2. Sarasademdang tembang - (4)
4. Tarutsü indang ashitem - (6)
5. Alia - (5)
6. Mojing - (5)
9. Tai inyakba metet - (5)
10. Medemer hijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)


OLONG PAITEP # 6576 TELANGZÜBA

TIPLIN :

2. Tatidang, 6. Angatet, 9. Aket,
11. Teimsür, 13. Rara,
14. Memeshi, 17. Mangdang.

LANGTSÜNGLEN :

1. Ente, 3. Tapet, 4. Ain, 5. Taküm,
7. Asür, 8. Tarak, 10. Teki,
12. Raksa, 15. Ents, 16. Hin.



ALOKBA TASÜ YIPTEN NUNG :

Alokba : Tantsü, ni masüdangsa nai kü dang langka nangzükangma.

Warakla : Kwa kechi nangzükdaktsüner?

Alokba : Ni sür külen na Sobangba den kibong kümang no?

Warakla : Wa, nai pa sempar mahana? Nüna tsükchir ato!

Alokba : Aji agi ashi ato, nai ni khangshiba ama ya pa-a khangshidaktsüner ati.

Warakla : Oh Alokba!

~ Lilir : WhatsApp

Tanur asoba anogo nung salem osang den noksa angati adokdaktsünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Dumboor Reservoir Islands nung 'School on Boat' tenzüker



Agartala, July 15, 2023 (Agencies): Dumboor Reservoir nung aliba asetkong nung aliba kaketshirtem asoshi Tripura Education Department-i "School On Boat" services tenzüksüogo.

Dumboor Reservoir ya Dhalai district nung lir aser Bangladesh den international border lemsateper.

"Dumboor Lake nung aliba asetkong tilala nung kaketshirtem nüngdakba peritsütsüla" ta ta Secondary Education Director Chandni Chandran-i ashi.

Item asetkong nung alir kaketshir teimbaka atema Karbook - Dakmura Gomatibari SB School nung angazüker.

"Gari lenmang sendaktepa maliba ajanga kaketshirtemi school-i aotsü atema timtem kanga ajurur aser iba jagi rong tamajung nung mener senzür" ta lai ashi.

Tawa tu rong lendong tila ka atalok saka tia kaa kaketshirtem shinga lendongi mai. Samagra Shiksha indang Block Project Coordinator Damodar Tripura-i kaketshirtem nüngdak atema rong balaka ayutsü shisatet.

"Iba mapa atema senotsü ya Samagra Shiksha indang Access component ajanga agütsü. Tang onoki rong ka anepaluogo aser driver tajung ka nüboyimogo" ta Director Chandran-i ashi.

Iba school nung kaketshir 100 tema züluokogo aser kaketshir 50 shi kati anogoshia boat service amshitsü, ta laisa metetdaktsü.

TEPELA LEMSATEPER



LANUAKUM JAMIR (Aliba Village)

(Aso: 23rd July 1983 - Asü: 10th July 2023)

Onoki teti meima aliba **Asür Lanuakum Jamir** ajungben lendong ataloka Kibubai iba lima nungi jar ogo. Pa tasüing Meluri Town nungi tasoli yim tashi bener arua, asüko maparen ajak nung Arogo, lokti tentet balala, kija aser kibong kwinakati yaritepogo ajak dang kanga pelaba lemsateper.

Nenok temeim mapa tajung asoshi asen Teyanglur Tsüngremi nenok tali mojang ta ozü sarasadem.

- **Temeim kinungtsü, chirnurtem aser kinungertem.**

Zomi Students' Federation-i kentener Tapta anema FIR benok

Imphal, July 15, 2023 (Agencies): Zomi Students' Federation-i nüngtugu kentener Tapta anema First Information Report (FIR) ka benokogo.

Tapta-i mejema atenba kenjang nung Kuki nung samatsütsü ashir aser iba ya 'hate speech' aser 'incitement of violence' lir ta FIR nung shia lir.

Churachandpur Police Station indang Officer-in-Charge tsüingdang benokba FIR nung Tapta-i tamangba yimsü, kin, tasodak, talidak, oshi aser item mesükba atema telok balala tsüingda tsükchitep adokdaktsür ta shia lir.

Pai tensa mejungi akümtsüsa

inyakogo aser Scheduled Castes/ Scheduled Tribes (SC/ST) anema inyakshangshio go ta Zomi Students' Federation-isa ashi.

Tapta dang Jayenta Loukrakpam ta ajar aser pa ya Meitei nung nüngtugu kentener ka lir. Pa ya Imphal nung alir aser July 7 nü ken ka sayaba nung "Kuki nung ajak metepset tashi Meitei nung yimjung nung malütsü" ta tena lir.

Tapta-i 'Power of Attraction' ta ser kensep ka mezüing sayaba sülen Manipur nung kanga nüngtugu aküm. Iba sülen kümtem süia arudang Manipur nung nisung aikati pa kanga sapua aküm.

Guwahati nung hon shibelener 2 apu

Guwahati, July 15, 2023 (Agencies): Assam Police-i nisung ana ket nungi Rs 34 lakh jenjang hon bena aliba apu.

Tenati hon ya Bangladesh nungi Meghalaya ajanga bener aruba ama temulung malemer ta police-i ashi.

"Special Task Force kati Meghalaya nungi aruba gari ka sülen anidak aser idangji Guwahati kübok Lokhra nung driver-i motorbike nung aruba nisung ka den langka melentepa angu. Onoki motorbike nung mena aliba nisung meputet kechiyong traffic ajanga

pa jena otet" police ketdangsur kati ashi.

"Onoki gariji anendaktsür mita repringdang Rs 22.70 lakh bena aliba angu. Iba sülen driver-i motorbike nung amenba nisung indang ki tashi STF personnel anir ao" ta ketdangsurisa ashi.

"Onoki iba nisung indang ki tonga aodang pai driver ket nungi meshiba gold bars yimsadakja lia apu" ta police ketdangsurisa ashi.

Onoki apuba hon ji gram 585 shi liasü aser iba indang jenjangji Rs 34 lakh shi liasü ta paisa shisem.

**GOVERNMENT OF NAGALAND
DIRECTORATE OF TECHNICAL EDUCATION
NAGALAND, KOHIMA**

NO.DTE/ESTT-2/02/2023-24

DATED KOHIMA, THE 14TH JULY 2023

NOTIFICATION

This is to notify all concerned that there will be a 2nd Spot Counseling on 20th July 2023 at 11:00 AM in the Conference Hall of the Directorate of Technical Education to fill-up the vacant seats in Para-Medical, Agri. & Allied Courses for the session 2023-24 based on NSEE-2023 merit-list as shown in the table below.


The NSEE-2023 Candidates whose merit falls within Sl. No. 251 to 500 are informed to attend the said Counseling without fail with two (2) nos. of passport size photograph. Failing to attend the Counseling shall be treated as non-acceptance/declined.

Those candidates who failed to submit their CI - XII marksheet shall not be considered for the said Spot Counseling.

Sl. No	Name of Course	No. of vacancies
1	OOT	02
2	B. Sc. Nursing	04
3	B. Pharm	08
4	B. Sc. Horticulture	10
5	B. Sc. Fisheries	04
6	MLT	01
7	B. Sc. Agri	24

(Er. VipulhouLhoungu)
Director.

Ukraine army nok dangtsü atema Russia-i tashi ajak amshidar: Zelenskyy



Zelenskyy

Kyiv, Chiteni/July 15 (Agencies): Ukraine anüolen tip aser anütoklen sepaitemi Russia nungeri atsünger aliba meyipa agitsü atema nongshiba mapang Russia-i iba ya nokdangtsü atema takokba tashi tashi ajak amshidar, ta Ukraine tir Volodymyr Zelenskyy-i ashi.

Ukraine nunger ketdangsurtemi, imlaba dang nungi kanga agi tanemiba Russia nunger sepaitem mintoktsü atema inyaksangshidar ta ashiba mapang ka nung Zelenskyy-i iba olen lemsatepa liasü. Ajisüaka tesem aika nung Ukraine nunger sepaitemi Russia nunger ket nungi parnok litsü meyipa agiba osang angashidar.

"Russia nunger sepaitemi linük anüolen tip aser anütoklen asen sepaitem nokdangtsü atema takokba tashi ajak inyakdar ta asenoki ajaki takokba tashi jangja jangja angatetsüla," ta Zelenskyy-i ashi.

"Asenoki ali meter meyirejang kwika meyipa agidir aser kongsa takok ngudir iba atema sepaitem nem tenüngsang agütsütsü nüngdaker," ta pai ashi.

Zelenskyy-isa, pai kidanger linük Belarus nung security tensa dak sendakba nung tongtibang osang kar angazükogo, koba pai kanga junga asadangdar, ajisüaka amokmeren ulurabo masü ta ashi.

"Asenok raraba tesem nung

dang rangloker lir," ta pai ashi. Russia indang Wagner mercenary teloki Belarus nunger sepaitem nem training agütsütsü tenangzüktepba ka yangluogo ta osang adokba sülen Ukraine tir yagi Belarus indang iba olen ya lemsatepa liasü.

Belarus indang defence ministry-i Hokolbarnü sangdong ka ajanga ashiba agi, tarutsü nung training aser armed force nung kongsang balala indang unit tem tsüngda tajangshiba tem lemsateptsü atema sentong yanglutsü asoshi Wagner den tenangzüktepba ka yangluogo.

Defence ministry-isa, linük yimtiba Minsk nungi km 90 shi pilar aliba Asipovichy kübok training agiba tesem nung Wagner telok nungi sepaitemi Belarus nunger sepaitem nem tetuyuba balala agütsüba video ka lemsatepogo.

Ministry-i Belarus nung Wagner telok nungi sepaitem military training den koma sendaktepa ali iba indang osang tejangja magütsü, kong parnok jenoktsü atema temelaba agütsür lir. Russia nung military lenirtem anema apusoba sülen parnok iba linük nung jenokdakja liasü.

Ukraine den rara nung Belarus ya Russia tir Vladimir Putin indang teyarir tulutiba kümogo.

Kasa mapang nung Ukraine tir office nungi Andriy Yermak-i Hokolbarnü ashiba agi,

Ukraine nunger sepaitem asoshi iba rara ya kanga tasak kümogo aser Russia nungertem mintoktsü atema inyaksangshiba ya imlaba ama kara kara moteter.

Anüolen aliba linüktem shirnoki Kyiv nem USD billion aika alang prangbong injang aser hadir balala agütsüogo, parnoki Russia nungertem takaratiba nung mintoktsü atema menongshir, ta Yermak-i ashi, shiba Zelenskyy indang right-hand lir.

"Parnoki menongshir, saka onoki nenok koma yaritettsü ta dang asüngdang," ta pai ashi.

South nung Ukraine nunger sepaitemi arkodong General Oleksandr Tarnavskyy-i Hokolbarnü Zelenskyy den ajurutepta sülen ashiba agi, pa kübok aliba sepaitemi tsükchirtem parnok amenoker aliba tesem nung kanga tatongi mintokdar.

Russia defence ministry-i Hokolbarnü sangdong ka ajanga ashiba agi, anütoklen Ukraine nunger sepaitemi 16 ben tashi parnok amaktsü merangba sepaitemi nokdangogo, kong Maryinka jila anasa tesem kar aser Klishchiivka yimtsü amaktsü merangba densema lir.

Military analyst Serhiy Hrabyskiy-i Ukrainian NV radio dang ashiba agi, linük anüolen tip len Berdyansk leni tejakdangi aotsü atema kanga tasak lir.

"Sepaitemi anüolentipleni meyoktsü atema tsükchirtemi kanga meranga nokdakdar," ta pai ashi.

Ukraine nunger sepaitemi linük southeast len yimtsüngtem meyipa agitsü aser anütoklen Bakhmut yimti temeket nung aliba tesemtem meyipa agitsü merangdar, koba Russia nunger sepaitemi May ita atsünga liasü.

Crimean peninsula den sendakteptsü asoshi Russia nunger sepaitemi tesem balala atsünger aliba ya raksatsütsü timla nung Ukraine nunger sepaitemi inyaksangshidar.

MENUNGRA BILEMTETER



Ojala Sosanglemla (Chuchuyimlang)
Asüba anogo – July 16, 2022.

Ojala iba akümüli toktsür küm ka ajunger saka la shisa tajung, ajemalu ochi agi mapang ajak nung onok atema sarasademtsüba temeim menungra bilemteter aser la akümüli mapa tajung onok mulungjang nung teti taküm alitsü.

-Temeim Chirnur & Kinungertem.

TENÜNGSANG AGÜTSÜR

Mopungchuket Senso Telongjem (MSTK) aser Ao Temolungtsür Telongjem (ATTK) Kohima-i **Kr. Mulungsenla A Jamir D/o Wb. A. Temien Jamir** aser Wt. Alenla, NPSC agiba CESE Examination 2022 nung takok tulu ngua, Post Graduate Teacher mapa ngutetba atema tenüngsang tetushi agütsür.



Iba takok tulu ya tarutsü lanurtem asoshi tatishitsü tajung, aser ne tenzükba wadang nung Naga nunger asoshi temoatsü sädakjangma. Tsüngremi ne taküm ano maneni moajang ta sarasatemtsür.

Sd/-
Onen Ozk
President MSTK

Sd/-
Ayimpongla
President ATTK

OFFICE OF THE MERANGKONG SENSO TELONGJEM

Dimapur _ 797112 : Nagaland

MERANGKONG SENSO TELONGJEM, DIMAPUR-i PELABA LEMSATEP

Dimapur, Chiteni/July 15 (TYO): Merangkong Senso Telongjem, Dimapur-i, Mrs. Omentula July 12 anepdang samar July 14 nikongtsütsü bushitetba mapang tashi nung kija, lokti tentet balala, Government aser non Government agencies kwina kati bendanga agüja yariogo, parnok ajak dang kanga pelaba sangdong ka ajanga metetdaksü.

Nenoki nübu, rongsen, shisatsü aser sarasadem agi nongita meyari asübo Mrs. Omentula taküm tajung anema lia mengutetla, ta kasa sangdong ajanga metetdaksü. Merangkong Senso Telongjem, Dimapur-isa teyari agütsür ajak dang pelaba melemsatetba atema sasaba lemsatepba den lokti tentet kar dang kanga mejeta pelaba lemsatepogo.

MSTD-i mejeta item lokti tentet dang kanga pelaba lemsatepogo:

- 1) Molungyimsen Senso Telongjem, Dimapur.
- 2) Mopungchuket Senso Telongjem, Dimapur.
- 3) Chümoukedima Ao Senso Telongjem.
- 4) Dimapur Kangtsüng Senso Telongjem.
- 5) Ungma Senso Telongjem, Dimapur.
- 6) Dimapur Wamaken Senso Telongjem.
- 7) Dimapur area Chuchuyimlang Senso Telongjem.
- 8) Dimapur Yimjenkimong Senso Telongjem.
- 9) Dimapur Langpangkong senso telongjem.
- 10) Ao yimti Village Council.
- 11) Asangma Senso Telongjem, Dimapur.
- 12) New Chümoukedima Youth Organization.
- 13) Darogapattar Village Council.
- 14) Darogapattar Youth Organization.
- 15) Süngratsü Senso Telongjem, Chümoukedima.
- 16) Nükmen Baptist Arogo, Darogapattar.
- 17) Women Police Station, Dimapur.
- 18) Different Social media teams.
- 19) Tuli Lenten Baptist Arogo.
- 20) Merangkong Metemsanger putu.
- 21) Merangkong Senso Mungdang Tekolak Committee.
- 22) Merangkong Senso Telongjem, Chumukedima sub-unit.
- 23) Chümoukedima Merangkong Tsür Telongjem.
- 24) Chümoukedima Langpangkong Senso Telongjem.
- 25) Merangkong Senso Telongjem, Kohima.
- 26) Merangkong Senso Telongjem, Tuli.

"Nenoki onok nem teyari agütsüba tebang agi rasa ashitsü makoker ajisüaka tulusang Tsüngremi nenok ajak molamoshia moajang ta sarasademtsür," ta MSTD-i metetdaksü.

Sd/-
Sosanglepden,
President, MSTD

Sd/-
Repalemba
General secretary, MSTD

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA

NO.DTE/ESTT-2/NEET/01/2021-22/

/Dt. Kohima, the 15th July'2023.

NOTIFICATION

This is to inform all the candidates who have applied and submitted online forms for undergoing MBBS/BDS & Allied courses during the Academic session 2023-2024, that the Merit list is uploaded in the Department website: www.dtenagaland.org.in and also in the Notice Board of the Directorate of Technical Education, Nagaland, Kohima.

The candidates are therefore informed to thoroughly cross-check the details furnished in the application form such as; Name of the candidate, Father's Name, DOB, NEET mark, All India Rank, etc.

In case of any discrepancies, the candidates are informed to provide correct details to the office of the undersigned on or before 20th July 2023. Thereafter, no correction or changes in any manner shall be entertained.

Selection and nomination to fill up the State reserved seats will be notified in due course of time.

(ER. VIPULHOU LHOUNGU)
Director.

Mokokchung nung Taekwondo tetoktepba aka



Lady Bird School Mokokchung Under-14 Taekwondo Tournament temer kelen takok angurtem MDTA pur aser Lady Bird School purtem aser District Sports Office nung achaayangertem külemi tangokba noksa.

Mokokchung, Chiteni/July 15(TYO): Mokokchung nung tanu Department of Youth Resources & Sports-i ayongzükba Under-14 Taekwondo Tournament Lady Bird School nung Mokokchung District Taekwondo Association-i(MDTA) achayanga kaogo.

Iba tournament ya Department of YR&S Annual Calendar nung Catch Them

Young agitsü aliba tournament ka lir. Tanu iba tetoktepba asayamung nung teburtem- 27 kg; 27-32 kg , 32-42 kg; 37-42 kg; 42 - 47 kg; 47 - 52 kg aser Tetsürtem-28 kg; 28-33 kg; 33-38 kg; 38-43 kg item nungi tetoktepbatem agia liasü.

Tetoktepba metenzükdang sentong tatsüka agiba mapang nung District Sports officer Mokokchung Angovito-i tajungshi o jembi. Mokokchung

District Taekwondo Association Tir Supongwati Jamir-ia tarur pela-a agizüka jembiba den tang iba tournament nung telemsa(category) balala nung tajungertem shimteter aruya aliba State Level Under 14 Taekwondo Tournament July 20 nungi 21 tashi IG Stadium Kohima nung akadang Mokokchung tenung nungi shilem agidaktsütsüta metetdakja ashi.

Long jump asayar Sreeshankar 2024 Olympics atema qualify süogo



Murali Sreeshankar

Chiteni/July 15, 2023 (Agencies): India nunger long jump asayar Murali Sreeshankar-i Honibarnü Asian Athletics Championships nung silver medal ngua 2024 Paris Olympics atema qualify süogo. Pai 8.37m jokteta liasü.

Arishi küm 24 tain Sreeshankar-i tatemangbuba ajokba mapang 8.37m jokteta Olympics atema qualify süa liasü. Paris Olympics nung asayatsü atema qualification mark ji 8.27m lir aser qualification ya July 1 nü nungi tenzükogo.

Iba asaya nung Chinese Taipei nunger asayar Yu Tang Lin-i 8.40m jokteta gold medal angu.

Taoba ita National Inter-State Championships qualification round nung 8.41m joka August ita asayatsü aliba Budapest World Championships atema Sreeshankar qualify süatoker liasü. Iba asaya nung pai 8.41m joktetba ya tang tashi nung pai tajungtiba joktetba lir.

Kasa asayamung nungsa Santhosh Kumar-i, tebur 400m hurdles nung bronze medal ngua liasü. Pai alizüing 49.09

second nung tongteta liasü, koba pa indang career nung alizüing takaratiba tongtetba asütsü.

Iba asaya nung nung Qatar nunger Mohammed Hemeida Bassem (48.64 seconds)-i gold angu aser Japan nunger asayar Yusaku Kodama (48.96)-i silver medal ngua liasü. Santhosh-i taküm India nunger tebur asemteperem rongnungi 400m hurdles nung alizüing takaratiba tongteter lir.

Arishi küm 25 tain asayar yagi taoba küm 49.49 second nung alizüing tongteter liasü, koba pa indang career nung alizüing takaratiba tongtetba liasü, ajisüaka tang iba asayamung nung pai alizüing takaratiba tongtetogo.

Ano India nungersa Yashas Palaksha, final atema qualify asü saka shilem maig.

India nunger kati danga tang tashi nung Asian Championship nung men's 400m hurdles asaya nung gold medal ngua mali. Joseph Abraham-i 2009 küm iba asayamung nung silver medal angu aser paisa 2007 küm bronze medal ka nguogo. M P Jabir-i taoba asayamung ana nung bronze medal nguogo.



Premier League club Arsenal-i Honibarnü sangdong ka ajanga West Ham United nungi England nunger international asayar Declan Rice alizükba sangdongogo. Rice ya club aikati alitsü atema merangdanga liasü. Osang ajanga ashiba agi, Arsenal-i pa alitsü atema euro million 105 shi agütsüogo, koba otsü tasen ka asütsü. Kasa mapang nung Arsenal-isa Dutch nunger defender Jurrien Timber alizükba Hokolbarnü sangdongogo.

Sahal Abdul Mohun Bagan Super Giants nung denogo

Kochi, Chiteni/July 15 (Agencies): Kerala Blasters' midfielder Sahal Abdul Samad, Mohun Bagan Super Giants den denogo. Pa küm asem atema tenanzüktepba yangluogo aser iba den ano küm ana atsülangtsü asoshi lenmang sadema lapoka yuogo.

Kasa mapang pa melena defender tejen Pritam Kotal, taruba season atema Blasters nung denogo.

"Club-i asayar ka melena Sahal Abdul Samad transfer asütsü asoshi mulunga agizükogo. Club-i meyoknüseta Sahal yoker, shiba 2017 küm nungi Blasters nung kanga tongtibang asayar ka liasü. Pa tarutsü takok nung aotsü imlaja atar," ta club sangdong ka ajanga metetdaktsü.

Osang ajanga ashiba agi, Sahal yoktsü atema transfer fee ama Blasters puri lakh 90 agizüktsü aser iba den Kotal-a club nung adentsü.

Sahal den sendaktepa aliba source kati ashiba agi, mezüingbuba küm asem nung pa nem sen crore 2.5 shi agütsütsü aser iba den tanga taatem aser goal idaktsüba shia bonus agütsütsü. Kasa mapang nung

Kotal shiba lenisüba nung Mohun Bagan SG puri taoba küm ISL kokogo, pa den küm asem atema tenanzüktepba yangluogo. Pa nem küm nung sen crore 2 agütsütsü.

"Mohun Bagan SG den tenanzüktepba yangluba ya kiyimba sempet tajungtiba lir. Ni kü indang career nung ISL khen danga koka mali. Ibayongji ni takok marok akoktsü atema Mohun Bagan nung denogo," ta Sahal-i osangbenertem dang ashi.

"Kerala nungi nungtugu asayar IM Vijayan aser Jo Paul Ancheri nunger amala asayartem Kolkata indang club tem nung asayaba ajanga ajaki jangja aküm. Ni Kolkata-i mao tsüingda parnok den sensak asemtsü aser parnok tebilemba angadangtsü aser temaotsü meshitsü. Parnok tang tashi Kolkata nung kanga nungtugu lir. Parnok ama nia nüburtem mulung koktettsü nükjidong lir," ta pai shisem.

Sahal, Blasters nungi 97 ben asayaogo aser pa ya iba club nungi timtiba asayaba asayar liasü. Sahal-i, tetoktepba ajak nung goal 10 idaktsü aser assist 9 süja liasü.

US Open: Sen semi-final-i iogo; PV Sindhu tsükogo



PV Sindhu

Lakshya Sen

Chiteni/July 15, 2023 (Agencies): US Open Super 300 badminton asayamung tetsür kija asaya quarterfinals nung tamakok anguba sülen PV Sindhu tsükogo, ajisüaka Lakshya Sen-bo takok ngua semifinal-i iogo.

Sindhu shiba world ranking nung 12buba nung lir la iba asayamung nung seed tasembuba asayar liasü, la China tsür arishi küm 24 tain Gao Fang Jie-i 20-22 13-21 agi tsükdakja liasü.

Tebur kija asaya nung Lakshya-i 21-10 21-17 agi S Sankar Muthusamy Subramanian ayong ayonga koka liasü.

Semifinal nung Lakshya, China nunger second seed asayar Li Shi Feng den asayatsü. Tena tsüingda tang tashi nung tiben asayar lir aser Sen-i ponguben aser Feng-i asemben koka lir.

Tetsür kija asaya nung Olympic medallist Sindhu-i China tsür la den ya kanga meranga asayadang ajisüaka mezüingbuba game nung Sindhu-i tena tsüingda rally talanglang asayaba mekoktetba ajanga asaya mekoki liasü.

Tanabuba game nungbo Fang Jie-i Sindhu amokbanger asaya aser India tsür la nem ya net nung asayatsü aser drop shots asayatsü atema maongka magütsü liasü.

Tebur kija asaya quarter final asaya nung Lakshya-i külem India nunger arishi küm 19 tain asayar Sankar Muthusamy ayong ayonga koka liasü.

Lakshya-i rally asayaba mapang pa dak kanga temulunglemteta asaya aser pai rally 42 tashi koka liasü aser kasa mapang nung Sankar Muthusamy-i rally 27 kokteta liasü. Tena tsüingda minute 38 asaya liasü.

BILEMDANGANG

"Asüküm agi nisung ka jenjang makai kümdaktsür."